


সনার চিঝি নাগুরী

আলোময় চাঙমা



সনার চিঝি নাগুরী

আলোময় চাঙমার একক ছড়া গ্রন্থ



সনার চিৰি নাগুরী

(একক ছড়া গ্রন্থ)

গ্রন্থকার :

আলোময় চাকমা

প্রচ্ছদ:

শুপংকর চাকমা

সহযোগিতা:

বি. জ্যোতি ভাস্কর

গ্রন্থসত্ত্ব:

গ্রন্থকার

যোগাযোগ:

আলোময় চাকমা

মোবাইল : ০১৭৬৪৩৫৬৮৮১

ইমেইল : alomoyc6@gmail.com

এমন কেউ কি আছেন—যে ছোটবেলায়
আমপাতা ঝরা ঝরা, হাতি মাটিম টিম বা ঐ দেখা
যায় তালগাছ পড়েন নি? আশাকরি নেই! কত
মজা করে ছড়া কেটে অভিনয়ের মাধ্যমে
আমাদের গেলানো হত তাইনা? বাবা-মা সর্বদা
ব্যস্ত থাকত যাতে আমরা মুখস্ত করতে পারি!
অন্যদের শুনিয়ে হাততালি কুড়াতে পারি! সত্যি
বলতে কি আজ আলোময় দা'র রচিত চাকমা
ভাষায় ছড়াগুলো পড়ে মনে হচ্ছে আমরা ছড়ার
মজাটা কখনোই পুরোপুরি পায়নি! ছড়া আবৃত্তির
আনন্দ থেকে অনেকাংশেই বঞ্চিত হয়েছি! এ
কথাটি হয়ত বাংলা ভাষাভাষি ব্যতীত অন্য সকল
ভাষাভাষিদের জন্য সত্য! ছড়াগুলো সত্যি অনেক
মজার! অনেক মধুর! অনেক মিষ্টি! বিশ্বাস হয়
না? নিজ ভাষায় পড়ে দেখেন!

—বাসুদেব চাঙমা

০২/০৪/২০১৫

তজিম পাদা

(০১) জুম হাবা	9
(০২) বেঙ্ ডগন্ত্ ক্র' ক্র'	10
(০৩) ঠুত্যা বুইয়ার	10
(০৪) দ্বি দাজ্যা রা	11
(০৫) সনার চিজি নাগুরী	13
(০৬) সনার চিজি	13
(০৭) জুম রাগা	14
(০৮) নাগুরী	15
(০৯) হাঙারা ধরা	16
(১০) বাদল' গুলি	17
(১১) পিচ্ছুঙ্ পিচ্ছুঙ্	17
(১২) ভাতুয়া মনা	18
(১৩) পিদে	18
(১৪) জুন্ পহর	19
(১৫) চুগ্নুঙ্ আবি	19
(১৬) মুক্যাথুর	19
(১৭) হাম্মো নাগুরী	20
(১৮) চিগোন্ ছড়া ইজা-মাজ	21
(১৯) পোবাং বিজি	22

(২০) শালি পিদে.....	23
(২১) সনার গরবা.....	24
(২২) তেঞেঁঝাঙ.....	24
(২৩) কুরবো.....	25
(২৪) সনার আৰি.....	26
(২৫) বো হৰা.....	27
(২৬) মুক্যা গাজত্ চগদা.....	28
(২৭) সুঘোর জীংকানি.....	28
(২৮) বেলেইয়োর ঘুম.....	29
(২৯) মিলনি পাদার ন'.....	30
(৩০) চ'গদা.....	31
(৩১) তদেক.....	31
(৩২) টুত্রিং টাট্রিং.....	32
(৩৩) হক্কেং.....	33
(৩৪) ধুধুহাঙ.....	33
(৩৫) তিদাশাঁক.....	34
(৩৬) বলাএগাঁ.....	34
(৩৭) কাঙারাঁ ধরা.....	35
(৩৮) বো চা.....	36
(৪৯) চড়ই বাহ.....	36
(৪০) দ্ব'ছজ্যা.....	37
(৪১) বাজে ঘর.....	38
(৪২) জাল বাহ.....	39
(৪৩) তিমপুর.....	40
(৪৪) টঙঁ ঘর.....	41
(৪৫) মল্যে ঘর.....	42
(৪৬) নাদেং.....	43

(৪৭) মর লাঙোনী	43
(৪৮) জুম্	44
(৪৯) আলপালুনি বন্ধ	45
(৫০) তেনতেঙুরি	46
(৫১) পেত্যো ফিডিং.....	47
(৫২) সনার চিজির বুগোপাদা.....	48
(৫৩) বোলী পিনোন	48
(৫৪) মাজ' জু	49
(৫৫) মাধা রাঙা জুম্মোধান	50
(৫৬) পদারার চাংমা লেঘা	51
(৫৭) আৰি	52
(৫৮) বিনি ধানান মুজিয়ার	52
(৫৯) বান্দরে শুগাদন ধান.....	53
(৬০) চিজি ইক্কে মামু ঘরত.....	53
(৬১) ওলি.....	54
(৬২) বোলী	56
(৬৩) মারেহ পিধে	57
(৬৪) ছাবিনেহ	57
(৬৫) মিজেল' দুলো হার্বারী	58
(৬৬) সনার চিজি গাজ্ বান্দর.....	59
(৬৭) জারহাল্যা - (১).....	59
(৬৮) জারহাল - (২),	60
(৬৯) চিজি আধত পিধে.....	61
(৭০) হত্ গোরাম্	62
(৭১) ছড়া ঈবো	63
(৭২) রা বাঞেঁঁ রি	64
(৭৩) জুরপল্লা	65

(৭৪) ম' বল্ একা	66
(৭৫) সনার চিজি হেব'	67
(৭৬) ফুজি	67
(৭৭) উন্দুরোহান্ উল্	68
(৭৮) জেদেনা হৈ	69
(৭৯) আঝাৰ মাজ	69
(৮০) চেজেক বুৰুক	70
(৮১) ডিজিটাল বৈদ্যালি	71
(৮২) চিজি ইক্কলোত্ যেব'	72
(৮৩) বেবে বেনান্ উদোনত্	72
(৮৪) হন্যাঁ হামো?	73
(৮৫) সনার চিজি ইক্কলোত্ য়াৰ	74
(৮৬) আমা চিজি ওমা ওক্	74
(৮৭) বান্দৰ' ধান্ তলোই	75
(৮৮) যে চাঙমা সে চাঙমা	76
(৮৯) আন্ধাৰ ঘরত্ অবং পহর	76
(৯০) ফুয়াই ই ই...বাল্যা	77
(৯১) ওলি (ঘুমপাড়ানি)	78
(৯২) চিত্ পাগল্ ডাঙঁৰ ভুজি	81
(৯৩) আমা ভুজি ধহল্ করা	81
(৯৪) বান্দরে ঝাড়দন্ ঘুচে তায়	82



সনার চিৰি নাগুৰী

আলোময় চাঙমা

(০১) জুম হাবা

ভাঙুন্ অলাক্ হগরা,
খে লগই য' থরা থরা,
ন' থাকুয়া আর মরা মরা।

পথান্ অইয়ে দুরোদুরি,
সিঙুন্ আর' মুড়োমুড়ি,
যা তাগল্ ল' তে মনত্ গুরি।

মা পিখীমিৰে স্বাক্ষীয়ে,
এক্ কুপ্, দিকুপ্ দিনুঙ্—
ধানে-সুধোয় ঘৰ ভোৰে দোক্ লক্ষীয়ে।

নানান সুধোমে চাষা চেই,
ডালি বাহজায় এগেম হেই,
বর মাগি পিখী পিখী সুগে থেই।।

—১৭/০৯/২০১৪

(০২) বেঙু ডগন্ত্ৰ ক্ৰ' ক্ৰ'

বেঙু ডগন্ত্ৰ ক্ৰ' ক্ৰ',
 চিজি অইয়ে ডৰ' মৰ'।
 এক আহধে দুলো,
 এক আহধে লুরো।

বেঙু আনিলো দুলো ভুরি,
 ঘৰত্ৰ নেইদে কানা হুড়ি,
 নুন্ মুরিচ্ হিচ্ছু নেই।
 ইদুঙ্কন বেঙু হিঙেরী হেই!

(০৩) ঠুত্যা বুইয়ার

হোলোই হোলোই আমিলা আগা,
 মামা দেৰ হাঙাৰা তাৰা।
 পিবিৰ পিবিৰ দোগিনো আহভা,
 জুরো পুরি গেল্ ভুইয়ত্ৰ ছাহৰা।

ঠুত্যা বুইয়ার ওলোজোল্,
 চিজিৰ চোগোত্ৰ ফেজা পোল্।
 শাৰাল্যাচিল্য শো মারি,
 চোখকুয়া দিন' পহৰ্ গুরি।।।

(০৪) দ্বি দাজ্যা রা

তিবিরিাঙ্ গুইবো শর-শরার।

হুচ্যা হুরাবো কহর-হরার।

রাঙা বে পরানান্ ধহর-পরার।

পেক্কুয়া পুনে লহর-হরার।

লুছ্যাঙ্ বেলেইবুয়া ঘর-ঘরার।

বুড়া হুরোবো অধক্ তক্-তগার।

ভরন্দি আদামত্ পুজ্জ জয়-জয়ার।

জুম্মোউনে দিয়োই এজ' সংজয়ার।

গুলিত্ ছগদাবুয়া তিক্-তিগার।

রোদে চোখকুন মির-মিরার।

য়িনে দাভুয়া শির-শিরার।

তাগলগভুন্ পানি ঝড়-ঝড়ার।

ভাভুয়া মনাবুয়া হের-হেরার।

হুতুরি বুচ্যা পের-পেরার।

হত্তাল্ মিলাবুয়া ভেন্-ভেনার।

দরে পাদুরি গির-গিরার।

অজাত্যা মজাবো হেন্-হেনার।

ভীর অইয়ে ফারদ দুরি চিন্-চিনার।

দিবুচ্যা ঘুচ্যা তাগা বান্-বানার।

জুলি উতে আগুনান্ ভন্-ভনার।

গাবুর পাক্কে রাঙা দা হন্-হনার।

ননেইয়া নুদিবানী তেন্-তেনার।
 ন' ধুরিচ্ চিগোন্ দা ছুর-ছুরার।
 ছাজিত্ চিজিক্কো চেক্-চেগার।

হাজরত্ এরিয়া পুক্ জিক্-জিগার।
 নিগিলের পজাবাচ্ গল্-গলার।
 শন্ মজ্যে ঠেঙান্ বোন্-বোনার।
 ভ' অইয়ে পাগালা ভদ্-ভদার।

পানি তিরাজে ধুরি ছদ্-ছদার।
 আহধ্ ছাবরে য়াঁজা পদ্-পদার।
 ঝালে লেত্য ধের-ধেরার।
 ভুজোলে পিথীমি ধিগ্-ধিগার।

মুজ্জো যেই বুচ্যা তাক্-তানের!
 তেলে মাল্যা ধক্-ধগার।
 গড়া ফিয়োঙত্ ভাক্-ভাগার।
 মালা উগুননোয় বির-বিরার।

চিনদিরা জুক্কো লিক্-লিগার।
 আলচ্যা গপ্পো ফাক্-ফাগার।
 শোল্য হত্তরিবানি তাক্ তাগার!
 চোরাইয়া পিতান্ আর' চুল্-চুলার।
 হর' খেই জিলান্ টিঠ্-টিরার।।।

(০৫) সনার চিজি নাগুরী

সনার চিজি নাগুরী,
 চেই আগে তেহ্ আ'গুরি।
 তা মা এব' জুমোতুন,
 আনি দিব' ছোধো ফিরিঙ,
 চোখকুন তার গুরিঙ গুরিঙ,
 হারি লব' তেহ্ হুচোতুন।

হাঙারা দাঁড় অমা অমা (বড় বড়),
 পুড়িলে বাচ্ চ'না চ'না,
 হামেরেই দাঁড় হুকুরক।
 চিগোন্ চিজি গাই খেব',
 ন' মাক্কুয়া হাররে ন' দিব',
 সবাই ন' গুজ্জো জাগুলুক।।।

(০৬) সনার চিজি

সনার চিজি আঝিলে,
 দ্বি আহধ্ তুলি নাজিলে,
 হুতুরি বুজ্যার রাক্ জুরায়।
 নাক্ বাজি আর চোখ্ বাজি,
 বগড়া দাতোই দোল্ আঝি,
 দেগিলে পরান্ ধরফরায়।

রাঙা চিক্ চিক্ দিয়ান্ গাল্।
 বাবা চুয়ার ভুইয়ত্ যাল্।

আয় আয় ডাগের বাবারে।
 মামা দের বেগুনো তাবা,
 উলোন ছালত্ দগিনো আহভা।
 তুচ্যা ন' লাগিয়ো হিয়য় মামারে।

সনার চিজি ভাত্ রানে,
 মুগুজো গাজ' ফুল্ আনে,
 মালা ভাঙালোই।
 সনার চিজি লোবীয়ত্ গরে,
 চিক্কুয়া ডাগের তরে মরে,
 এজ' বেঙ্কুনে খারা অই।।

(০৭) জুম রাগা

হমরত্ বানি গুলি হাজা,
 গারেঙ্ ঘরত্ পার্বুয়া চাজা।
 লুকদি আগে চিগোন্ দাদা।
 এ হুল্ ও হুল্ গেলঙ্ ধান্,
 ইন্দি গেলে উন্দি হান্।
 পাক্কে জুমান্ গোদা।

গাজে গাজে তদেক্ ঝাক্,
 চুপ্ চুপ্ চপগুরি থাক্।
 আন্দলে আন্দলে রিনি চ'।
 গুলিত্ ইচ্চা ছাজ্ পোরেম্,
 চের আড়ি ধানর তঙ্ ভোরেম্।
 বাজিবার মুন্জুক্কো থেলে ফিরি য'।

বান্দরে হাদন্ পাগানা ধান্,
 বাদল হিজি জুরে টান্।
 ওলাবো চেই মার।
 ইক্কুয়া চোখ্ হাদি তাক্।
 পুরো পুরো বুগোত্ লাক্।
 ইক্কুয়া গুলিত্ পর।।।

(০৮) নাগুরী

চিগোন্ চিজি বেন্ বুনে,
 আলক্ তুলি ব'হাদি।
 সনার চিজি হুন্ হনার,
 বেক্কুনে শুন' হান্ পাদি।

মক্যা গাজর ছেছেক্ বাশঁ,
 জেদেনা গাজ' বিয়োঙ্,
 বিয়োঙ্ আবারায় গুরুঙ্ গুরুঙ্,
 গুজুরি উদে হয়োঙ্।

ফুল্ তুলে তেহ্ চোখ্ হাদি,
 বেক্ ফুলুন্ তার মনত্ আগে।
 বিঞ্যাঁ বাজে বিল্যা হাবে,
 মাসমূলা তার ন' লাগে।।।

(০৯) হাঙারা ধরা

লুরো লবে নেনা বোম্বা লবে,
 আক্লন্ অবে নেনা পিচ্ছের অবে?
 নাহি আর' ডরেম হবে!
 ভাক্ গুরি য়েবঙ্ দ্বিজন্ দ্বিজন্,
 ধুরিবঙ্ হাঙারা য়ে যার অজন্।
 পুজোর গুরি চ' আগি ক'জন্।

ধোঙওয়া লগে ধনবী য়েব',
 জুম্বাবী ম' লগে থেব'।
 সাজ্ গুড়ি গেলো লত্ দিবঙ্।
 দুলো পুরেলে ফিরিবা,
 তেগ' দজরত্ বাচ্ছেবা।
 একুই সমারে ফিরিবং।

ইজা-মাছ্ ফেলে ধুরি লোই,
 হোজুলী গুরি ভুজিরে হোই,
 রানি হেবংগোই সমারে।
 গব্ মারিবংগোই জুন্ পহরত,
 ধাগাধাক্যা বোই ইজোরত,
 এজ' এজ' বলাএগ্যাঁ দিলুঙ্ বেগরে।।।

(১০) বাদল' গুলি

হোচ্যা দাদা বান্দর মারের,
 হুগি বাদল্ কাক্ গুরি।
 বাদল' গুলিত্ অরিঙ্ রইয়ে,
 এজ' বেঙ্কুনে ভাক্ গুরি।

জেদেনা গাজত্ তদেক্ ঝাক্,
 বান্দরে হাদন্ ধান্।
 হোচ্যা বেবে তাক্ বাজে বাজে,
 গা ধোজ্যেগোই গান্।।।

(১১) পিচ্ছুঙ্ পিচ্ছুঙ্

পিচ্ছুঙ্ পিচ্ছুঙ্ লাই লাই লাই,
 দাড়ি মোরে দুয়্ ঘরত্ আয়।

মামা রানের বিনি ভাত্।
 উন্দুর ন' দেগিলে চোখকুন্ হাত্।

বিনি ভাত্ হেলে দেগিবে,
 আর' বিনি ভাত মাগিবে।

(১২) ভাতুয়া মনা

ভাতুয়া মনায় হের হেরার,
 ছতুরি বুজ্যা পের পেরার।
 সনার চিজি ঘুম্ ন' যার।
 ধুলাদে ধুলাদে আহধ্ ছুলার।

হেরেঙজু দুলোনত্ হেরেদ' চাক্,
 দুলন্ বুনিলা' চলাআপ্।
 লক্ষী চিজিক্ চুন্ধি থাক্,

সনার চিজিক্ ঘুম্ য়েব'।
 তা মা এলে তেহ্ জাগিব'।
 তা মা আনিব' পিতুঙুলো,
 বেঙ্কুন্ তেহ্ গাই হেব'।।।

(১৩) পিদে

হলা পিদে হলা দলা,
 গরের চিজি ফেলা-ছেলা।
 বিনি পিদে আহদা বেশ,
 হগা পিদের লাম্বা লেশ্।

শাম্মি পিদে গুল্ গুল্,
 বড়া পিদে চাগা।
 ডুগি মন্তুন্ ফেলা-ছেলা,
 ফুরেলে পিদে তোগা।

(১৪) জুন্ পহর

কাহদি মাস্যা জুন্ পহরান্—
 কারি নেজেল' পরানান্।
 দ্বি আহধ তুলি চিজি ডাগে,
 তা মাত্বন্ তেহ্ জুনান্ মাগে।
 আয় আয় চানান্ ইধু আয়।
 আমি মামালোই গায় গায়।

(১৫) চুগলুঙ্ আঝি

সনার চিজির চুগলুঙ্ আঝি
 চেলে এজ' যাদি-মাদি।
 ঠেঙাঁ দিনেই ন' পেবা।
 সময় গেলে ন' ধেহবা।
 সোনা-রুবো ভরে ভর,
 ন' মিলে আঁঝি জনম্ ভর।

(১৬) মুক্যাথুর

হজি হজি মুক্যাথুর,
 চঙরানি চেলে ভালোদুর।
 চিজি মুক্যায়ুন্ রাগেব',
 চগ'দা এলে ঝোগেব'।

বিনি মুক্যায়ুন্ গাই হেব'।
 রাজার পুয়ায় বো চা এব'।
 রাজার ঘরত্ বো দিবঙ।
 ভেঙপাদি ঝাক্ নাজেবঙ।

বাজি পোদেবং জয়াৰে,
 ছিদি নেজেব' বুয়াৰে।

(১৭) হাম্মো নাগুৰী

সনার্ চিজি নাগুৰী,
 বেন্-সুধো হাম্ ত' গুৰি।
 আহদা ধল্য জুম্ মূখ্যা,
 পিদিৎ ইক্কুয়া টঙ্ বুক্যা।

হাবিবার্ হিয়র্ হবর্ নেই,
 মুজিয়ার্ ধানান্ পাগিনেই।
 চেই থেলে হাররে ন' অব',
 নাগুৰী হামত্ আক্কোব'।

মাম্মা-চিন্দ্রা জুম্ জগা,
 মাম্মা যিয়েগোই তোন্ তোগা।
 নাগুৰী হাবিবোগোই কব'রক্ ধান্,
 সেনত্যা় পিঞেগোই নুয়ো পিনোনান্।

(১৮) চিগোন্ ছড়া ইজা-মাজ্

ওমা ওমা হাঙাড়া দাউ,
 ইতুক ইতুক শাজ্।
 চিগোন্ ছড়ান্ গধা দিলে,
 বানা ইজা-মাজ্।

নামালাঙ্ মাজ' ঝাঁক, আ—
 মোঁই হাঙাড়া ছ'।
 দাজ্যা ইজা বালোচ্ হাঙাড়া,
 হন্যাঁ লব' হ'।

মোন্ হাঙাড়া জেদ হাঙাড়া,
 দাড়ানী চেলে ওমা ওমা,
 চাক্ হেবা নেনা ঘিলুক্ হেবা,
 পুড়িলে বাচ্ চ'না চ'না।

পাদাত্ তলে গুদুঙ্ মাজ্,
 ধন্তে ধন্তে হুন্দি যাস্।
 গাদত্ চেলে ভরন্ ভরন্,
 বানা উগোল্ মাজ্।

মানেক্ বেগেনা লুই ভরন্,
 বেক্চুন্ পেদে ল'।
 চোগোত্ ন' পুচ্যা পাত্তোরী ইজা,
 লোই ন' পাল্লে থ'।

চুমো হেবাঙ্ দি গুদুঙ্ মাজ্,

মোন্ হাঙাঁড়া চাক্ বাদি।
 দাজ্যা ইজা মোঁই হাঙাঁড়া,
 গোরিবঙ্ হলা, নুন্-অলোদ্ দি।

মানেক্ বেগেনাৰ্ পাদা হেবাঙ্,
 উগোল্ মাজৰ্ শিক্যা।
 দেগিলে মুয়োত্ লেত্য এজে,
 অইয়ে পরানান্ লিলিক্যা।

রিঝুম্ বাজত্ আবুজি,
 মেজাঙত্ তুলি পাদা পোই,
 লেত্যো হা, লেতি্য হা, বানা দ্বি জনে,
 লোবিয়ত্ গোরিবংগোই।

হবরক্ ধানৰ্ আদাহ্ ভাত্,
 হলাগাজৰ্ পাদা পোই।
 লক্কি চিজিক্, সনার্ চিজিক্,
 জুম্বাবী সমত্ হেবঙগোই।।।

—৩১/১২/২০১৪

(১৯) পোবাং বিজি

ভঘদাঙ্ ভঘদাঙ্ পোবাং বিজি।
 উঝি খেব' সনার্ চিজি।
 উঝ্যাত্তুন্ আর' পুজ্যা চরপ্।
 পিনোন্ খাদিয়ে লাগেৰ্ ভরপ্।

নিবিলি নিবিলি গাজ' বুপ্।
 ছেড়ে ছেড়ে পোবাং থুপ্।
 ছগদা বান্দরে বুপ্ বুবান্।
 পল্লে পোবাং বিজি লুককুদান্।।।

(২০) শান্নি পিদে

পেহত্য পাদালোই হগা পিদে,
 শান্নি পিদেত্ দলা মিদে।
 শান্নি পিদে কে' সিজ়ে,
 ঘুচ্যা হলা দিই মিজ়ে।
 ডাঙর্ দাধা আদু কুবি,
 পিদে মুলিল' চিবি চিবি।
 ঘে' পিলাবুয়া বিজিদি গেল্,
 পোগোন্ পিলাবুয়া ভাঙ্তী গেল্।
 ভুজি আধত্ গরম্ পানি,
 মামা দেল্লোই দারু বানি।
 বেক্কুন্ অলাক্ ওলোঝোল্,
 সনার্ চিজি আহমক্ ওল্।।।

(২১) সনার্ গরবা

মোনো ওবোলা মামু ঘৰ্।
 চিজি এল' বজৰ্ পৰ্।
 সনার্ গরবা লুক্কি চিজি,
 কধা ন' কুইয়' হাবি জাবি।

মামু ধুরিলো কুচ্যা রাদাঁ,
 পোইয়ত্ ন' তুল্লো লাদা পাদা।
 কেকরেহকেক্ বারা বাহনি,
 পিদে দুগি দিল' মামী।

দুলু চুমোত্ মোজো দই,
 তেলে নিল্ মরে পাদা পোই।
 মামুতুন্ মামীরে লুক্কি পাং।
 লেজৰ্ ছাড়ি লারহারাঙ।।।

(২২) তেঞেঁঝাঙ

দনাহ্ হুয়োঙ' ধুরী বেই,
 পিবিৰ্ পিবিৰ্ বুইয়ার্ এই।
 হেরেঙজু দুলোনত্ সনার্চিজি।
 বুইয়ারান্ এজের আজিপুঝি।

দুখ্যা মা-বাপ্ ঘরত্ নেই।
 চেরআড়ি জুম্ কাবিনেই,

আধতান্ ধোই পাদতান্ ফেলে,
জীংকানি ন' চলের গমেদালে।

পার্বুয়াবেদর কেরেদ' চাক,
দুলোন্ বুনিল' চলাআপ।
করক্ করক্ রুয়োবাজ্।
তেঞেঁঝাঙ্ গল্লে কেজান্ পাছ্??

(২৩) কুরবো

১.
দিবুচ্যা মাধান্ ঘুমোত্বন্ উধি,
পাদল্ পাদল্ উলু কুদি,
সিদোল্ দলা মুরিচ্ বাদি,
উলু কুরবো গুরিদে।
আড়' মাধাদি গত্তনা বাহবে,
উলু কুরবো চাবে চাবে,
ছিচ্যে ছিচ্যে ও পরানবে...
মরে ডাগিদে।
কধে কধে লেত্য এজেদে।।।

২.
তেদোই কুরবো বীজি সমত,
জীংকানি সুত্তো থেব' মনত।
ভুদি কাবি গোঙোঁত্যা কুরবো,

গরাজত্ চাবে তিনো চেরবো।
 আধিক্ ঝালে জিল্ তিভিরায়!
 আধিক্ হরয়ে দাত্ শিরশিরায়।
 নাঙ্ ঘিনিলে লেত্য ধেরধেরায়।
 এক্ চাবানত্ চোক্কুন্ ঝোরবুয়ো!!!

৩.

কান্ডোলো মুজিত্ বড়ই পলে,
 বীজি ফেলেনেই গমেদালে।
 হর' হর' কচ্ কচ্ গুরি,
 খাদে লাগে গম্।
 চোরবেকগুলো আ কাজা আম,
 মাম্বা-চিন্দ্রা কাজুবাদাম,
 ছুচমরিজোত সিদোল্ পলে,
 তারেও ন' কুয়ো কম্।।।

(২৪) সনার আঝি

পোথ্যা ফুলর পাগোরান্,
 সনার চিজির্ আঝিয়ান্।
 সনারচিজি গান্ ধুজ্যে,
 শুনদে শুনদে কান্ ভিচ্যে।

দাধা যিয়ে বাজারত্,
 বাবা যিয়ে জুমকাবা।

ভুজি যিয়ে কুয়োগাঙত,
মামাহ যিয়ে তোনতোগা।

ছ'বাই তারে ন' লাচ্চুয়া,
তা লগে লগে ন' পাচ্চুয়া।
আঝি আঝি চে আগে,
মনত্ তুলি কি মাগে।।।

(২৫) বো হঝা

ডাঙর্ দাধা খবং বানি,
জুম্ম ছিলুম্, ধুদি পিনি।
বোম্বা আধত্ চিগোন্ দাধা,
সাজিত্ তলে আগা পাদা।

ঠেঙধোচারিত্ পানি নেই,
বেক্ কামানি রয়ে পুরিনেই।
সনারচিজি বো হঝা যিয়ে,
ঠেল্যা পুল্যাঙ্ বুগিনেই।

বো'বুয়া কানের গুজি গুজি,
দাধা মনান্ হুজি হুজি।
পানবাতে এল'গোই ওঝারে।
আজু চলাআপ্ খীঝারে।

(২৬) মুক্যা গাজত্ চগদা

মুক্যা গাজত্ চগদা,
 মামা কো ধুজ্যে অকধা!
 জুম্ রাগেইয়া কিয়য় নেই,
 পেবার ছলাত্ তেহ্ আভিলেস্ খেই।

পত্তি ধান্ শিজত্ উগুরিক্।
 ন' পারর! বেন্-সুধো কাম্ ত'গুরি!
 বাবা ধুরিল' এক্ লামা!
 বেবে মনান্ অল' শ্যংসমা!

ইজোরো মাধাদি ফুঁজি দুবো।
 ভুজি কয়দি কুবো? কুবো?
 চিহ্ৰেফাস্যা ফেজাকচাক্।
 চুমি চেলে কেজান্ পাছ্???

(২৭) সুঘোর জীংকানি

কুইয়াং আলুলোই বাচ্ছুরি টং,
 ছিদোলে কালা অয় সং।
 লাঘা লাঘা বাচ্ছুরি দিক্,
 ভাত্ পোইলগত্ মুরিচ্ দিচ্।

ফুঁজি পুড়িবো তোনানত্,
 মেজাঙত্ পোই, বোইনে ছানানত্।

মিদিঙা চুমোত্ ছেজক্ শাঁক,
বাড়িবে পাদা পোইয়ত্ আভাকভাক্।

আৰি-খুৰি মোক্কো মর,
জুমো তাকঠিগিনীত্ মোনোঘর।
ঝালে পুড়িবো চোগোত্তুন্ পহন্ পানি,
ইয়ানি কয়দি মর সুঘর জীংকানি।।।

(২৮) বেলেইয়োর ঘুম

সুধো ফালিত্ বেলেইয়োর ঘুম্।
বানাহ্ তগায় কুনদি উম্।
বানাহ্ ভাত্ দিলে মূ ফেরায়,
রেত্য এলে ঘর বেড়ায়।

দাড়ী চেলে ফুরং ফারাং!
উন্দুরে গত্তন্ ঘুঙ্গুরং ঘাঙ্গারাং!
চোলো গুজিত্ উন্দুরো বাহ্।
লুধুরো লুধুরো পো-ছা।

বুঙত্ দিলুঙ পেত্যপাদা।
উন্দুরে গল্লাক্ ছাড়ানাদা!
দুখকাম ধানুন্ উন্দুরোর জু।
বেলেইবো ঘুম্ যার উভো মূ।।।

(২৯) মিলনি পাদার ন'

মিলনি পাদার ন',
 পেত্য পাদার পাল্।
 এই ন' যেব' দেজ্ কুলে,
 সত্তা, ধুরং খাল্।

কেঙেত্ কেঙেত্ দাউঁ টান',
 তুবোল্ উধের গুজুরি!
 এত্তে ছলাত্ কানং কানং,
 সনার চিজি নাগুরী।

শোরবো আমিলেত্ মোঁইকাঁঙারা,
 গেলঙ্ ধানর ভাত্ মজা।
 কস্বা কস্বা সুধোফালি!
 অইয়ন্ ভুত্ পঝা!

ঠেঙত্ খারু, কুজি খারু,
 এ্যাধ' দাধ' বাঙুরী,
 দোগান্ বাহৰি কিনি দিমোঁই,
 ছারা দেধে নাগুরী।

সাজেক্ কুলভুন্ লত্ দি,
 কান্তে গধাত্ ভিরেমোঁই।
 রাজার' পূন্যাহ্, কদলপুর,
 বুদ্ধমেলাত্ ঘুরিমোঁই।।।

(৩০) চ'গদা

চগদাবুয়া ডগরের ধেধেক্ ধেধেক্।
 চিজি আঝের কেদেক্ কেদেক্।
 গুইয়াম্ পাগানা ইক্কোও নেই।
 চগদাবুয়া খায়য়েই পাড়িনেই।

বাদি গুইয়াময়ুন্ লাক্ ন' পায়।
 ছীয়ো বাচো জরা দি দায়।
 কহরা গুইয়ামো চাবেল'।
 দুধো দাত্তো ভাঙীল'!

বগড়া দাত্তোই ব' যিয়া আঝি।
 মামাহ্ মনান্ হুজি হুজি।
 গাজ' খেলাত্ চ'গদা।
 চিজি কো ধুজ্জোগোই অ কথা।।।

(৩১) তদেক্

জুমো লেজাত্ চাক্কো গাজ্।
 তদেক্ পলে কেজান্ পাছ্।
 মামাহ্ কুয়েদে গুজ্জে দে।
 বাবা কয়দি থোক।
 তদেগে নিলে ধান্ শিজ্জে,
 পুলগাঙ্ ভরন্ লোচ্।

ছিচ্যে মরা আধা জেদা।
 তদেগ' হুলে ভেধা ভেধা।
 ডাঙুর দাধা শাহর বানি,
 তদেগ' ছ' দেল্লোই আনি।
 তদেক্ ছ' পালেব' নাগুরী।
 চে' রয়েগোই আ' গুরি।।।

(৩২) টুত্রিং টাত্রিং

কত্বাহ্ কত্বাহ্, টুত্রিং টাত্রিং।
 গল্ল' চিজি কুত্তিং কুত্তিং।
 পদনাবাচ্চুরি শাজ্ কন্।
 আলু মিজেল্ পলে গন্।

আলুয়ানি বেক্কানি শেজ্ গল্ল'।
 আলুপাদা তালু ন' অল'।
 বেগুনো হরা মিজেল্ দো,
 ফুঁজি পলে ছা ছাড়িবো।

উদত্ থুদত্ পানি নেই!
 তোনো তাবা শুগেনেই।
 পুল্যাঙ' তলাত্ বেগুনো হরা,
 সিগুন্ তগাদে আধামরা!!!

(৩৩) হক্কেং

ছড়া আগারে হজ্জা গাছ,
 কম্বা সুরং তার!
 এধেদি চেলে ধল্যাচরত,
 টুথ্যা বুইয়ার বার!
 বুজ্যা আজু হজ্জা গাচ্ছো,
 গুচ্ছেং গুচ্ছেং!
 শুনি ন' পারে কাঙ্গিলিত্যা,
 হক্কেং হক্কেং।।।

(৩৪) ধুধুহাঙ্

ধুধু ডুডু কাঙারাঁ হুদু ;
 সাজুএগ্যাঁ মাধান্ ভুদু ভুদু।
 চিগোন্ ছড়াৎ ধুধুহাঙ্ ;
 দাড্ ন' হাং চাক্ হাং।
 ঝবাত্ ঝবাত্ উড়ি যার ;
 শিলোত্ থোনেই কাঙারাঁ দাড্।
 চিজির ভাগত্ কাঙারাঁ দাড্ ;
 লুচ্যাং বেলেইবুয়া লুবকুদার।।।

(৩৫) তিদাশাঁক

কুজি রাইএগাঁত চঙঁরা।
 রুয়োঁ বাজত্ ভঙঁরা।
 রাইএগাঁ ভুইয়ো তিদাশাঁক।
 নিলে গুলোদক্ বাচে থাক্।

গেল্লে সাপ্তাত্ বাজার বন্।
 খিয়ে নেই উজুনো কনজন।
 উত্তোমাজান্ ছিনিপোল্।
 মিজেল' দুলো উভোদ ওল্।

বেলেইয়ে নিল' শুগুনো মাজ্।
 মিজেলান্ খেলগোই কুগুরে।
 উভোদ পুন্দুরি জেদতেল' বদল্,
 তিন্নো ফাধালা উগুরে।।।

(৩৬) বলাএগাঁ

দুরোদুরিত্ মামু ঘর,
 সান্তো মোনো ওবোলা।
 মুড়োমুড়িত্ মজা ঘর,
 বেক্চুন্ অলাক্ জুম্ বলা।

মামু খেব' নুও ভাত,
 ভাগিনেয় পেল' বলাএগাঁ।

রাদা' ডাগত্ লর দিল',
সনার চিজি পরাএগ্যা'।।

থেবুরুতটেঙ্ থেবুরুতটেঙ্,
ঠেঙ' মুড়িত্ শন্ কাদা'।
আঙুলো ফাগাত্ ইয়ান্ কী????
হন্,, কেচো মাদির ঘু'দলা!!!

(৩৭) কাঙারাঁ ধরা

লদক্ ধধক্ মোনোঘর ;
বারেদি বাচ্ছে জুনোপহর।
কিজিক্ কাজাক্ গুরো ঝাক্,
ওজোলেঙান্ হুয়ে ফেল্লাক্।
মা-বাপ্ যিয়ন্ কাঙারাঁ ধরা,
ঘিলুক্ দলা এগাহরা।

পবং পবং কধা হঅ,
পাল্লে আর' লাহরে যঅ।
বানেমরা দগা কেম্,
চোগেদি ন' দেলে হেনে যেম্।

চিগোন্ ছড়ান্ পাদা ঝুড়ি,
মাছ্-হাঙাড়া ভরাভুরি।
যুনি বেহ্ পারজ্ চাদারা,
ভুত্ পারা পারা কাঙারাঁ।।।

(৩৮) বো চা

লুৱান্ অয়ে জুৰো জুৰো,
 অদ'গত্ উত্তে উমোকুৰো।
 বীজোৱ ৱাদা'বো ধৱা পোল্,
 যদি গৱ' জায়জুগোল্।

আবাদা গুৱি সধ্যা নাধ্যা,
 চঅলাং চঅলাং মুৱিচ্ বাত্যা।
 কিৱিং কিৱিং তোনো ঝুল্,
 দেঘা যায়দি ঠিগিনী চুল্।

নুনো জাগাত্ নুন্ নেই,
 তেল' জাগাত্ তেল্।
 চাৱবোপেদীৱে বো চা এনেই,
 বেক্ ইজ্জতানি গেল্।।।

 অদ'গত্ - কুৱো যিয়ত্ বদা পাৱন্।
 চঅলাং - নিঘুচ্ ন' অয়ে মুৱিচ্ বাত্যা।

(৪৯) চড়ই বাহ

দগিন্ দোৱি মজাঘৱ,
 ধান্ তলোইবুয়া ইজোৱত্।
 ফেজাহজাৱ চড়ই বাহ,
 *তুলিউজু **পেজাৱত্।

ধান তলোইয়ত্ চড়ই ঝাক্,
 ছুলি হাদন্ ধান্।
 নানু ঝুৱেৰ চানাহ্ ভুৱোত,
 চাবাং ন' চাবাং পান্।

ৰুয়ো বাজত্ তুলোন্ টাঙে,
 চিজি তুলেৰ তুলোনত্।
 উল্লে ফেল্লগোই ছুচমৰিচ্চুন,
 ইক্কোও নেইয়াৰ কুলোনত্।।

 *তুলি- ছনছিনি ঘৰৰ চালৰ বেঘত্বুন্ অজল্ জাগা।
 **পেজাৰ- ছনছিনি চালৰ ছনৰ ইক্কো ইক্কো ঝাপ।

(৪০) দ'ছজ্যা

হগড়া ভাদত্ নুন্ গুলি ;
 খে লগোই য' মুলী মুলী।
 সুঞ্জুগো জুমান্ *আৰেঙ্ ওই ;
 কণ্ডাকুতি ফেলা গেল'গোই।

কোচ্যা দাধাৰ ঘৰ বেড়ানা ;
 বুজ্যা আজুৰ পেরপেরানা!
 ননন্-ভোজোৰ গপ্ সপ্পানত্ ;
 বেল্ দীবোৰ পধৰ আদানত্।

দ'ছজ্যা ঘৰৰ ঝাক্কুয়া খানা ;

কাম্ পরেদে দ্বি আধ্ বানাহ।
 **ধুঙুরী মন্তন্ মামা, বাবা ;
 ***ছাবাক্ জুমোত্ নেইদি ছাহবা।।।

 *আরেঙ-পুরোনো অধেঅদ, নিবিলি।
 **ধুঙুরী -জিরেন্ নিয়া গুরি। নিত্য।
 ***ছাবাক্-পরিষ্কার, কোনো আড় নেই।

(৪১) বাজে ঘর

ছিনেছিঞা বাজে ঘর ;
 পুরি এল' ধহল্ পহর।
 রাদায় ডাকহাল্য কেফ্রেহেঁক ;
 নাগর্ মাতন্ ঝাড়' পেক্।
 পইত্যা ঘুম্ লেজা পুরেয়ে ;
 বাবেয়া *রুয়ৌবুয়োও থুম অয়ে।
 ফুদো আঙরা ওলোঝোল ;
 হগড়া ভাদত্ **আনো পোল।
 বাবা ধারাল্লোই তাগলান্ ;
 মামা যিয়েগোই কুয়োগাঙত্।
 সনার চিজি ***কাত্ অব' ;
 বই-পত্তর মুজুঙত্।।।

 *রুয়ৌবুয়োও - যে দারবুয়া সারা রেত্য জেদা থেবাত্যে

ওলোনছালত্ ছেই ঝাবে দি রাগা অয়।

**আল্লো- ছ'কালি জমা অদে অদে যে কালি/কাজর জমা বদে।

***কাত্- কাবিল্, পাঙগা, শিক্ষিত'।

(৪২) জাল্ বাহ্

দুলো ধুরি থাক্ পরান্,

মুই জাল্ মারং।

চুমো খেবাং দি খেবংগোই,

বেঙ্কুনে পেঠ্ ভরন।

মিলনি পাদা গজর গুরি,

দুলোবো দে ধীবে।

দুলো বে উধি মই কাঙারাঁউন্,

নিগিলি যেবাক্ চ্যে।

শিলত্ তলে জেত্ কাঙারাঁ,

কাল্ কাল্ দাড়্।

*ধুধুগোত্ চেল্ বানাহ্ ইজা-মাজ্,

অজল্ রিবাঙ্ পাড়্।

চবলক্ চবলক্ ন' যেচ্ পরান্,

ইজা-মাজ্ ঝাঁক্ অবাক্।

জুচ্ জুচ্ গুরি হুচ্ বাড়ে,

ম' পিচ্ছে থাক্।

মানেক্ ভেগেনা, পাত্তুরি ইজা,
ইক্কোয়ো বাদ্ ন' দিচ্।
টারেঙ্যাঁ বেঙ, কোরল্লুরি বেঙ,
শিরেয়ুন্ চিবি দিচ্।

নুন্-অলোদ্, মুরিজ্ ফারি,
হলা গুরিলে।
চনাহ্ চনাহ্ বাচ্ নিগিলি,
লেত্য্ ব্লুড়িলে...।
চনাহ্ ভুরোত্ বজিনে,
গপ্ মারি মারি খেবংগোই,
পরান্ দ্বি জনে।

কলা পাদার বিজোন্ বিজি,
গরম্ ভাত্ জুরেবং।
মুলুক্ মুলুক্ দাড়ানী,
চিজিরে থোই দিবং।।।

*ধুধুক - জুড়িত্ পানিয়ে গাত্ হুচ্ছে মোরোঙ।

(৪৩) তিমপুর

ছ'কুড়ি টেঙাঁর রুবোরাদি ;
তিন্ কুড়ি টেঙাঁর পিনোন্ খাদি।
মালাহ্ শুগোর ইক্কো পাচ্ মুত্যা ;
মদ্ দ্বি হম্ দক্ মুখ্যা।

জৰা কুৰোবুয়ো লক্ষীয়ে পায় ;
 আনি পেবাচ্যা হামাক্কাই।
 *সাজং সাজং বো নিবা ;
 **বেঙু পাধি ঝাক্ আনিবা।

বো লামেবা, ঢুলো ডগৰে ;
 বো পুর আয়ুন্ মাজ' সোমবাবে।
 দাবাহ্ টেঙা বাদ দিলাক্ ;
 তিমপুরো খানা ছিৰেলাক্।।।

 *সাজং- এক দিনো ভিদিৰে। বিঞা পহত্যাভুন্ খুৰি
 বিল্যা সং এক ছলায়।
 **বেঙু পাধি - বাদ্যযন্ত্ৰ বাজেয়া দুৰি।

(৪৪) টঙ ঘৰ

ধুধুক্ বে' বে' তেত্ৰেতুক্ ;
 টঙ ঘৰত্ ভজান্ সুখ্।
 পিবিৰ পিবিৰ বুইয়াৰ বায় ;
 কাষ্ট কিয়া জুৰে যায়।

*শিঙে বানে ২*পাৰ্বুয়া বাজ্ ;
 রেত্ নীঝি অলে শুনি থাক্।
 লাঙা-লাঙোঁনী মন্ কধা ;
 কোই ন' পেলে মন্ কাদা।

জুমো তুণনোত্ বুবুর গাজ্ ;
 টঙ্ ঘরত্ পার্বুয়া বাজ্।
 পার্বুয়া বেততোই ভিরি বান্ ;
 তদেগর জু পাগানা ধান্।

দেবায় গল্ল' ঝড়্ মূঘী ;
 চিগোন দাধা যিয়ে জুম্ চুগি।
 গায় গায় আগে টঙ্ ঘরত্ ;
 চিত্ ন' ভিজের পরানত্।।।

 *শিঙেঁ - ১০/১২ আধ্ লাম্বা বাজর বাদ্যযন্ত্র। যার র' ২/৩
 মেল্ সং শুনা যায়।
 ২*পার্বুয়া - একজাত্ বাজর নাঙ্। বুনোহাদাত্ বেশ্
 বেবআর অন্।

(৪৫) মল্যে ঘর

কিলোই খিয়চ্? মোজো দই।
 কুবোত্ খিয়চ্? পাদা পোই।
 আর' কি? চাম্বা কলা।
 বিনিভাত্ ঘাঙে মিধে দলা।

পেঠ্ ভুচ্যে? তিগুত্ তিগুত্।
 পেদ' আদুরি চিগুত্ চিগুত্।
 আর' খেবে? ন' খেম্ ন' খেম্।
 কাটোল্ গাজর ছাবাত্ যেম্।

কাটোল্ গাজত্ ঘিলালুদি ;
 বিএগাঁ পহঁত্যা চোখকুন ফুদি ।
 হিরিঙ্ হিরিঙ্ ধুলোনা ;
 মল্যা ঘরত্ বেড়ানা ।

(৪৬) নাদেং

ভুদেমাৰে ভুদেমা ;
 কোইদেনা তুই কোইদেনা ।
 নাদেং তোগে চুপ্ ন' পাং ;
 মামা ডাগের ওয়াং ওয়াং ।

বিনি পিধে, শান্নি পিধে ;
 জেদেনা খৈয়ত্ দলা মিধে ।
 মুই ন' খেনে তরে দিম্ ;
 সে বদলে নাদেংয়ো নিম্ ।।

(৪৭) মর লাঙোনী

চুলেমূলে লাচ্যা হুল্ ;
 পোড়া ঘুত্যা কিয়া রং ।
 মুজুঙো দাত্ ইক্কোও নেই ;
 আর' নেইদি চোগো বং ।

আধ্ ঠেঙাঁনি লিভিঙ্ লিভিঙ্ ;
 উত্তান্ চেলে ধোলিয়া ।
 যেন্, বুদু ছিনা শুগুরিগুলো ;
 হিয়োই নেই মোলিয়া ।

বুনোহাদায় পাঙগা ;
 কোনো কাম্ বাগি নেই।
 দিয়েল্যা সুধোনাল্ পাদাস্যা গুরি ন' পারে ;
 পিনে পুরিবো কিনিনেই।

মরিচ্ দিলে অলোদ ন' দে ;
 সিদোল্ দিলে নুন্।
 কোই ন' ফুরোয় সেদক্ আগে ;
 মর লাঙোনীর গুন্।

মনান্ তার ভারী দোল্ ;
 চোখ্ পিজিনে রিনি চায়।
 দিন্মো এলে যাজার পুরোয় ;
 পর' হুতুরি মাধি পায়।

মাএগ্ নাঙে এলাফেলা ;
 মুই তা নাঙে রাধামন্।
 তারে লোম্বোই হামাক্কায় ;
 জীংকানি মনলে পাদারি অং।।।

(৪৮) জুম্

পেত্য ফিড়িঙয়ো বদা পাচে ;
 ধান' পাদান্ লুঙি পোচে।
 নিবিলি ছেরে মাম্মা করাহ ;
 ফুরি ন' পারে বন্ ফরাহ।

ফুরি এলুঙ্ ধাপ্ দজর ;
 বেগুন ন' পেলুঙ্ এক্ ছাজর ।
 ধানে মারিল' বেগুন্ গাছ্ ;
 ছচ্ দি ন' পারে ফুঁজি বাচ্ ।
 বজরর রিত্য ধানে, ফুঁজি ;
 তা'আব' মুয়োন্ হুজি হুজি ।

*ধোই মাধালোই বেন্ বাজেইয়ে ;
 সনার চিজি আজের নেইয়ে ।
 সনার চিজিরে কী নেজে দিম্ ;
 ফিড়িঙয়ো বদাবোলোই বুজ্ দিম্ ।

*ধোই মাধা - বেন্ কাবিলে যে সুধো মাধানি থায় ।

(৪৯) আলপালুনি বন্ধ

তেদের তেদের দেবা ঝাড়্ ;
 ভুইয়োত্ উয়ে পানি ।
 বোল ন' থেলে তোগে আন',
 ছিলুম্, ফাদাঁ কানি ।

কুদু পেবাহ্ ফাদাঁ কানি ;
 কোনাকুনিত্ তগঅ ।
 বোল বানিবার দুরি ন' পেলে ;
 ফারোতদুরি হগঅ ।

উচো ফুচোই হারা অবং ;
 গোদা দিন থিয়া।
 আজার মাস্যা ঝড়ত্ ভিজতে ;
 লাগে বলপিয়া।

আলপালুনি বন্ধ পিয়েই,
 দেবাই ধল্য দর।
 রেত্ ন' অলে নাঙ্ ন' ঘিঞ্ ;
 কিয়েজনে ঘর।

দল্ নেই, পাটি নেই,
 নেই ভাগাভাগি।
 সুরবুদি বোলো মুখ্যা ;
 বানাহ্ তাগাতাগি।

বি দ্রঃ- ইরুক আলপালুনি নাঙে কোনো বন্ধ নেই।

(৫০) তেনতেঙুরি

পিজুম্ বাজত্ তেনতেঙুরি ;
 হুতুন্ উড়ি এলে।
 বাচে থাক্ লেজত্ ধরঙ্ ;
 শান্নি পিধে খেলে।

বাবা মলের শান্নি পিধে ;
 মামাহ্ দেল্লোই যে পিলা।

জ্বৰগো উৱে আৰ' আগন্ ;
খাজুৰো মিধেৰ থৈ মলা ।

উত্তোমাজাত্ নুন্ চুমো ;
লুডুঙ ভৱন্ মাছ ।
ধুমো উজু নুনোমাছ ;
আৰ' কি কি চাস্?

উড়ি বেড়াস্ ইন্দি উন্দি ;
দুনিয়ৈ খবৰ পাহছ ।
দেঘে দিবে? কুদু আগন্ ;
পিভুঙুলো গাছ ।

(৫১) পেত্যো ফিড়িং

চুপচাপ মাঠ্যা সাপ ;
পেত্যো ফিড়িং চুক্কি থাক ।
ভিৰেছ ৰাজাৰ হুণ্ডম উয়ে ;
ভুইয়ত চহতন চনাহ্ ৰাক্ ।

আতুবো বাজৰ চুমো ছাড়ি ;
তুই আগছি য়েল্ পাদাত ।
চোখকুন ডাঙঁৰ, শিৰে চিগোন ;
সবাই গুন্তে নেই মাধাত ।।।

(৫২) সনার চিজির বুগোপাদা

থিদির থাদার সনার চিজি,
 মারের গপ আঝি আঝি।
 য়েত্ মারিম দাত ছাড়িম,
 আধ' চাবরত্ বাঘ মারিম।

গুজদি লামিল' বাঘ তোগা,
 একো আজারত বেঙ্ চাগা।
 চিগোন বেবে হুচে মুচে,
 চিজিরে তুলিল' পোচ্ছে পোচ্ছে।

(৫৩) বোলী পিনোন

সং নেইয়া আগা হতাহ,
 লাম্বা-বাধি সুধোনি।
 দেহরি-লাম্বা অইয়ে হেনে,
 টাম্বো বাজর জুদোনি।

থুর চুমোবোত্ সুধোন্মুলি,
 ছ'বাই পাক ন' হর।
 জু দর' উয়ে বোলী পিনোনান,
 একাইয়ো বাক্ ন' উজার।

চিজি গরের তেনেন তেনেন,
 টানি দের ব'কাদি।

ভুজি তুলের বেনত ফুল,
ন' মাধি ন' বুলি।

সুধোন্মুলিত পুজ্জেন' সুধো,
নানু ভরের চানানত।
মাজ্জেং দাধারে বো আনি দিবং,
কাদি ন' অলে আউনত।

*জুদোনি - বেন' গর আ টাঘো বাজর মধ্যে দুরির অহলগা।

(৫৪) মাজ' জু

বড়গাঙ্ আগারে গল্ল' বান,
এধেদি অল' পানি।
মাছ উজাদন সুরঘাত্যা,
নল-হাগাড়া ভাঙী।

জুমোর মাধাত্ দাধাহ্ ভুজি,
গজ্জা ভুইয়ত যেই।
হাবি আনিলাক ঘোঞ্যাঁ মাছ,
ভরন দিবা লেই।

ওলোদ আগে নুন নেই,
বাজার অল' বন্।
লক্ষী ভুজির ভাজে ন' হুলোর,
হিঙোরী শুগেই থন।

আজু হয়দি পিজ়েদি ফার',
 দাধাহ্ হয়দি বুগেদি।
 বাবাহ্ হয়দি শিক্ গাধ',
 মুয়েদি ফুরি লেজ়েদি।

(৫৫) মাধা রাঙা জুম্মোধান

মাধা রাঙা জুম্মোধান,
 বাক্কুয়া অলাক হাউয়্যা।
 যা ধগে তে আজ়ের নেই,
 কিয়য় নেইদি রাউয়্যা।

ধুধুক বাধন চগদায়,
 গাজত্ উদিনে।
 তদেগে দেদন শিজ়োলী হাবা,
 মালিয়ে ডাগিনে।

পাল্লো শুগরে তলোই বেঝে,
 রেত্য মারন ধান।
 য়েত্তুন আগন আলাভলা,
 ইঅ' থান ন' পান্।

উয়ুরিক পেঙ্কুয়া ডলং বুনের,
 হাচ্যা বেত ফিরি।
 হোচ্যা দাধাহ্ গাবুর পাঘি,
 আদাম বেড়ার ঘুরি।

হে পুরেলাক! হে পুরেলাক...!!!

গোদা জুমান...!!!!

*হাচ্যা বেত - যে বেভানিত নিল বুক্কো দি ধাক থায়।

(৫৬) পদারার চাংমা লেঘা

চেজেক্ চেজেক্ ভাত পিলা,
চজর চজর তিবিরাত্ গুই।

পধত দেলুঙ চাংমা লেঘা,
উগুরি ইদিলুঙ মুই!

হোজিয়া! নাহি চালান্ দিয়া,
পধ' জগা আং।
গাধি বুর পারি ধাভা ধাভা,
বৈদ্যিয়া ঘরত যাং।

বৈদ্যিয়া দিল' নীধিং চেই,
তন্ত্র-মন্ত্র গুরি।
মনান মর দাঙাঁ যার,
উভোদ যাবত গুরি।

(৫৭) আঝি

আগাজত জ্বলদন চান-তারা,
 মস্তগত চিজির আঝি।
 এ আঝি পেধা নয় দিলেও,
 সাতরাজা ধন আঝিপুঝি।

অ'লে ন'বঅ মায়ানা পেবাহ,
 যুনি চেলে আওচ গুরি।
 মনে মন মাঝি দিলে,
 ন' লাগিবো হানা ছড়ি।

(৫৮) বিনি ধানান মুজিয়ার

লুক্কি চিজিক চুক্কি খেচ,
 ছজি চিজিকুরে তুই ধোলেচ।
 ত' বাবে যিয়ে হাটোনত,
 জুমান আগে আদানত।
 বিনি ধানান মুজিয়ার,
 চগদা, বান্দরর, পেক আধার।

পুল্যাঙ পুড়়েলে মুই ফিরিম,
 বিনিহোগা পিধে বানেই দিম্।
 মালাহ শুগোরবো হাবিলে,
 পিধে হেবার তেল পেলে...
 চাগা চাগা নারিহুল ছদি,
 মারেপিধে, বেঙপিধে দিম্মোই ডুগি।
 —চিজি ঘরত থাক ব'জোচ।

(৫৯) বান্দরে শুগাদন ধান

চিভং ভুইয়ত মিলোনি পাদা,
চাক্কো গাজত্ পান।
বেলান ডুবোল্লোই আঝি আঝি,
বান্দরে শুগাদন ধান।

মামাহ্ দেল্লোই তোনো তাবা,
নানু ভাঙের হাঙাড়।
ফোবে ফোবো চিজি এল'
ধাভা উড়িঙ চঙরা।

হুদু? হুদু ধান তলোই,
ধান শুগাদন বান্দরে...
ওবাং পাদারে হাঙাড় চাক্,
উল্লে ফেল্লগোই নানুরে!

(৬০) চিজি ইক্কে মামু ঘরত

বার' বক্করে (বতসরে) ভাগিনে এল',
মামু ঘর ভিলি।
হেবার-দেবার আলুলো দুলুলো,
হিয়য় ন' গুজ্জো হলি।

জুরগোত আগে হাধি মিধে,
চুমোত আগে দই।

লক্কি চিজি সনার গরবা,
আগা পাদার পোই।

পোগোন ভরন সান্নি পিধে,
হক্কে অহভাক হিজেনি।
চাঘি চেলে হেই ন' পারে,
বেক্কুন অহলাক আনুনি।

(৬১) ওলি

ত'আবে (বাবা) যিয়ে হাট্টোনত,
ত'মা (মাহ) আনেল্লোই পানি।
ত'নানু (নানু) দিব' হুচ্ছো ভরন,
পিত্তুংগুলো আনি।

সনার চিজি ঘুমান যা...
ঘুমান এজের লাঙেল দিঘোলী,
জুমোর মাখাত দিনি।
ঐ... ঐ... ঐ... ঐ...

পিদিত দিলুঙ রাজার বিচ্ছোন,
শুনিথাক চিক্কো কবির পশ্চন।
... চৈতমাস্যা হরানত,
... নেইদি পানি ছড়ানত।
হুঁ... হুঁ... হুঁ... হুঁ...

বুড়ি হয়দি মুই এক হলুঙ্ হাং...

বুজ্যা হয়দি... ধুর!
 কবি মাবো এনেহ্ এনেহ্,
 একে উয়ে দুর।
 ঐ... ঐ... ঐ... ঐ...

আগারেদি গেলে চেয়োত বাজিবে...
 এখেদি গেলে দুবোত।
 বড়পেদা এজেরবো... দুলো ধুরি,
 পোল্লে থাক্কেই দুরোত।
 ই... ই... ই... ঙ্গ...

পেত্যো পাদার হোগা পিধে,
 মুয়োত বাহরী থায় সেধক মিধে।
 সনার চিজিক্কো ঘুম য়েব'...
 বিনি হোগাযুন গাই হেব'...
 ঐ... ঐ... ঐ... ঐ...

ওলি ওলি... ওলি ওলি... ই..
 ... হিরিং হিরিং ধুলি।
 এই ঘুম আনিল' হত্তাহ বাবু,
 ... সনার পালকিত তুলি।
 লোকিখ চিজি ঘুম য়েব'...
 ওলি ওলি... ওলি ওলি...
 ই... ই... ই... ঙ্গ...

(৬২) বোলী

চুলোত দিলাক্কেই চুলচারক,
 তদাত দিলাক্কেই আহজুলি।
 টেঙাছড়া আর আলছড়া,
 হানত দিলাক্কেই বুমোলী।

হজ'ফুল আর আন্দিক,
 আর' দিলাক্কেই রাজ্জুরে।
 আ'ধত দিলাক্কেই হজিবাঙুরী,
 বালাহার তাজ্জুরে।

ঠেঙতহার ঝনাত ঝনাত,
 ফুলহারয়ানি দোল।
 হুবোন থোনেই হুবোন পিনের...
 নো'বি অল' ওল্।

হেল্যাআঙুলোত সুধো বানী,
 ডাঙর ভুজি বো তুলি,
 বেড়' মাধাত টাঙে থলাক্কেই,
 তুমবাচ্ তেল' শিঝিলি।

(৬৩) মারেহ্ পিধে

ধান তলোইবোত ছরমা ছরো,
 ছিঁয়ো বাশছো হোই...?
 নানু ঝুরের চানাহ্ ভুরোত,
 চুধো চুধো বোই।

ছরো ছ'উন চিরিং চারাং,
 উধি ন' পাতন ইজরত।
 মামাহ্ বানার মারেহ্ পিধে,
 নিজেস নিইয়া পিজোরত।

বাবাহ্ আনেল্লোই আগা পাদা,
 চিজি ধুলের ঢুলোনত।
 চাল' উগুরে বীজ বীজিদি,
 রোদে গুগাদন কুলানত।

(৬৪) ছাবিনেহ্ ...

মোঁই হাঙাঁড়া চাক্ সমত,
 শোরবো আমিলে যুনি থায় মননত...
 হে চিয়ো...
 ফুদে না ন' ফুদে পরানত।

হেব' অলে আর'...
 পদনা বাচ্ছুরি দিগে টঙ,
 থেলে আদাফুল মিজেল্ দ্যুঙ।
 ...গভালে দিনেই সুজ্ মুরিচ্,

...আগা পাদালোই টিবে দিস্।
 মিজেল্ পুরিবাক্ বদাবলাহ্ ঘুঁঙুরো।
 দাজ্যা ইজালোই শিরেবলা হুমুড়ো।

ভাত্ পোইলগত্ মিঞ্যাঁ শাক্,
 হেলে গুলোদক্ বাছে থাক্।
 জুম্বী হব' আঝিনে,
 আহি বাঝাবিজেও...
 --- হেলে হেব' ছাবিনেহ্

(৬৫) মিজেল' দুলো হার্বারী

ইজে-মাজ্ তোগা হাঙাঁড়া ধরা,
 মিজেল' দুলো হার্বারী।
 পরান্ লিলিক্যার সোধ্যা মু,
 ভাঙাঁচাঙাঁ ঘরবাড়ী।

উত্তোমাজাত্ উন্দুরো জু...
 চাজাত্ থ'লে বেলেয়ে।
 হুগুরবো হেল'গোই বেরমা মাজ্,
 পেঠতো অল' ছেলিয়া।

ইচ্চা এব' তেহ্ শুনিবার,
 গোদা সাগা উজুনো।
 লুরান্ চুগি ছরমা হরো,
 আঘে বানাহ্ পুজুনো।

(৬৬) সনার চিজি গাজ্ বান্দর

গাজত্ উদিলে গাজ্ বান্দর,
 মাধিত্ থেলে ধল্যাপুক্।
 ঘরত্ থেলে পেনেন্ পেনেন্,
 নিত্য গরে জাগুলুক্।

দিন্নো এলে তদক্ তদক্,
 সিংগবা পঝা পিজোরত্।
 গুধি ভিদিরে ছাম্মো হাঝা,
 ওবাং পাদারে ইজোরত্।

যেক্কে অয়ও নাগর পুন্ডিক্,
 হধানি গাজিক্ গাজিক্।
 আঝিলে ঝুরি পড়ন্ চান-তারা,
 হানিলে হুজি চিজিক্।।।

(৬৭) জারহাল্যা - (১)

ফুকপাক্ ফুকপাক্,
 শিরোপানি ঝড়ফুদো।
 দিন্নো বাধি রেত্য লাম্বা,
 পহর অহবার নেই উদো।

ভাঙাঁচাঙাঁ হুরোলুর,
 বেলেওর নিত্য জু।

ডাক্ ন' কারের ডাক্য রাদা,
এখকন্ উয়েগোই ভেল্ ঘু!

আজু গাহর গোঁজেন' লামা,
নানু জ্বালের টাশ্চালান।
কেরানিত্ তেল্ ভিলি ঢালি দেগোই,
উভোদ্ পুন্দুরি জেততেলান!!!

(৬৮) জারহাল - (২),

নাঙে চাঙে ধামানা বেড়,
ঝেলাং ঝেলাং বানাহ্ ছের।
ফিবেক্ বাজর হিস্যাবল,
আধতলা অজল্ আমততল।

হুয়োংয়ো উজোনি জুরো আহবা,
বেল্ ন' ডুবদে পড়ে ছাহবা।
পিয়োক্ পিয়োক্ জুরো আহবা,
উম্ ন' বজে আভাঝাভা।

জুম সুধোর হেদার উম্,
যেদক্ পহর সেদক্ ঘুম্।
হগর-হাগার মজা ঘর,
পুনোত্ বাজিল' বেল' পহর।

(৬৯) চিজি আধত্ পিধে

জেদেনা খৈয়ত্ হাধি মিধে,
 শান্নি পিধেত্ ঘুছ্যা।
 বিনি হোগা আধা বেশ,
 ধুরি ন' পারে তুছ্যা।

চিজি আধত্ বিনি পিধে,
 আধত্ বাঝছে লেবেদে।
 মামাহ্ কয়দি পুড়ি দোং...
 লুঙী দিল' সেবেদে!

বেলেইবো দিলগোই একো গাল,
 মামাহ্ কল' ইঁহিঁ জঁক্!
 তায়ারাত্ বাঝে হুয়েদ' যেনে,
 গালত্ ফুদিল' নক্!

বিলেইবো ডগরের মিএং মিএং,
 চিজি আঝের হুজিয়ে!
 মামাহ্ ডাগের ওয়াং ওয়াং,
 ছ'বাই ন'শনের আঝিয়ে!

—২৮/১২/২০১৫ ইংরিজি।

(৭০) হুত্ গোৱাম্

বাবাহ্ য়েব' বাজারত,
 মিধে আনিব' কিনি।
 মামাহ্ দেঘোই ধান্ রোদোত,
 বান্দরঅ নক্ বিনি।

হুতথুন্ হেবং হুত্ গোৱাম্,
 মুলুক্কুন হেবং হোগা।
 সিধেনদি আগন্ লাস্বা লাস্বা,
 একতাল্ পার্বো ডগা।

জন্ গত্ গত্ ইক্কো ইক্কো,
 দিবং হুত্ গোৱাম্।
 চুমো ফারিমত্তোন্ মূও ভিদিরে,
 ফুন্ দিইদি জোৱাং!

ওঁ...উঁ...ফুঁ...ফুঁ...উঁ...ফুঁ...ফুঁ...
 হি গরম...ম..ম...!!!
 হি সোত্...ত্...ত্...!!!!

—০৪/০১/২০১৬

(৭১) ছড়া ঈষে

দাধাহ্ আধত্ ফাগাড়া-তাগল্,
 ভুজি মাধাত্ লুই।
 পিচ্ছে পিচ্ছে তারা লগে,
 দুলো আধত্ মুই।

দাধাহ্ কয়দি ছড়া ঈষি,
 ভুজি কয়দি ছাগিনাহ্...
 তিবুরুক্ তাবারাক্ পহন্ পানিত্,
 হম্বা হম্বা বেগেনা!

দাধাহ্ দিল' কাতে গোধা,
 ভুজি ঈষের ছড়া।
 মরে হন্দে ছ'বাই ফেলে ন' দিস্।
 চাঙেলে দুলোত্ ভরা।

ইজে-মাজে এক দুলো,
 বেগেনা হুবোত্ লোই?
 ভুজি কয়দি চুমো কাপপোই,
 কেবাং হেবংগোই।

—০৬/০১/২০১৬

(৭২) রা বাঞেঁ রি

বামত্ দিলুঙ মোষ মারি।
 য়েমান্ জাত্ চুরি চুরি...
 বে-বামত্ বে-পাগে পুড়ি,
 বাম্ ভাঙ্তী দুরোদুরি!

ইন্দি ন' পারঙর লুরিচুরি।
 জেবত্ নেইদি কানাহুরি!
 ন' পারঙর তোক্কিত্ গুরি।
 গেষেচ্যা, হাদন্দে ভেলে ধুরি ধুরি!

মাদিত্ ন' বাজে সং ঠেঙ' মুরি,
 ধাবা এই সাঙু ধুরি,
 হধান্ হল'গি টেনটেঙুরি।

মত্তুন্ রাগ উদি তরাতাঙুরি!
 হধে হধে ঘেছেগুরি...
 মনে হন্তে, রোদ্ ফোয়াং ভিদেফারি!!!
 হা... হা... হা...!!!!!!

—২১/০১/২০১৬

(৭৩) জুরপল্লা

পধ' পাজারাত্ চজর চজর!
 দেঘা যায়দি ভেরাক্ ভেরাক্।
 ভাঙ্গী হোলুঙ পরাক্ পরাক্,
 গরের ইক্কে তাদাক্ তাদাক্!

বেডুন্ ওয়োন্ ঝেলাং ঝেলাং।
 ঠেঙদো চারিবো পেলাং পেলাং।
 হন্যাঁ হধা হোই পবং পবং,
 যা ধোজ্যেগোই গজাং গজাং!

উড়িংয়ো উয়ে চবাল্ চবাল্!
 ছরমা ছরোবো হদাক্ হদাক্।
 গরের হন্যাঁ হঝক্ হঝক্?
 চিজি গরের তদক্ তদক্।

জুরো পড়িগেল্ পিয়োক্ পিয়োক্।
 রাদাবো হি ওল্ নিয়োক্ নিয়োক্!
 জুঁওরাবো হেলগোই ঘুঁত্ ঘুঁত্।
 দিলুঙ্ সেবেদে কুমুক্ কুমুক্!

দোগিনো বুইয়ারান্ পিবির পিবির।
 ওরোচ্য গরের বিবির বিবির।
 চামিনী বীজিউন্ ভগদাং ভগদাং।
 য়েত্য গেলগোই গল্যাং গল্যাং!

উগোল্ মাচ্ছুন্ ছল্যাং ছল্যাং।

হি চুর গুচ্ছেচ্? ফুল্যাং ফুল্যাং!
 এজেত্তে আঝি হিদিচ্ হিদিচ্!
 অলাক্ নে ন' অলাক্ হিজেনি গাজিক্ গাজিক্।।।

—২৮/০১/২০১৬

(৭৪) ম' বন্ এক্কা

পোঅঃ... পোঅঃ...
 ডবলা ন' হেই হাচ্যা হেচ্,
 ভাবী চিদি আধ্ বাবেচ্।
 বজেলুঙ্ হ্চ্ য়েদ' বলে,
 লাড়ে পাত্তে নয় হন' ধেলে।
 পোঅঃ... পোঅঃ...

পোঅঃ... পোঅঃ...
 আধত্ দিলুঙ্ ভাতজরা বান্,
 ম' বন্ এক্কা, জুরে টান্।
 টান্ টান্, জুরে টান্...
 টেঙ' হ্চ্ বিজিদি আন্।
 পোঅঃ... পোঅঃ...।

—০৩/০২/২০১৬

(৭৫) সনার চিজি হেব'

দাধাহ্ যিয়ে দুখ্ হামত,
 বাবা যিয়ে বাজারত্।
 টাঙে ন' থোই বাজার' ঝোলা,
 চাজা জগাহ্ পিজোরত্।

ননন্-ভোজে হোচ্ পাহ্ পি,
 পিজুমো পিজুমি শুড়ি-বোই।
 বাজার' ঝোলাত্ বেরমা মাছ,
 ওলা বেলেইবো হেলগোই।

পিধে মজাবো সেত্রাং মেত্রাং,
 হন্যাঁ সুমুরি দিব'।
 বেড়ত্ আবুজে লাস্বা হুচ্যাল্,
 সনার চিজি হেব'।

—১৩/০২/২০১৬

(৭৬) ফুজিঁ

আমিলে ছিনিলুঙ্ এক গজর,
 বাচ্ছুরি পেলুঙ্ এক ছাজর।
 ফুজিঁ মিজ়েলে বাচ্ছুরি,
 তুমবাচ্ তুমবাচ্ বাচগুরি।

হুজি হুজি ফুজিঁ দুবো,
 হুবো থোইনে হুবো লবো।
 উগোরবারও চিত্ পুড়ে,
 চুমি চেলে পেঠ পুড়ে।

(৭৭) উন্দুরোহান্ উল্

ও ভুজি, ছিনি ল' ফুজিঁ,
 গুলোদক্ সাবারাং।
 আবাদাগুরি চোয়োত্ অব',
 উন্দুরোহান্ উল্ হেবাং।

মিজ়েলে-হজ়ালে, সাবারাং দি,
 দিবে সুজ়মুরিজ়।
 চায়াত্ বাঝে সং মিদিঙেঁ চুমোত্,
 তলেদি আগুন্ দিস্।

চনাহ্ চনাহ্ বাচ্ নিঘিলে,
 বাড়়িবে চানানত্।
 এক্ গরাজ্ হেলে থাহর পেবে,
 হি উদে মনানত্।।

(৭৮) জেদেনা হৈ

বেগুন - মুরিচ্ জুম জগাহ।
 কিয়য় যেইয়ে নেই তোন তোগা।
 চেজেক্ বুৰুক্ পদ্ - যাদ।
 পা'ত্ ন' উদের তোনপাত্।

আজার মাস্যা দেবা দর।
 হদক্ থে পারে বান্কা ঘর।
 দেবা দরত্ জেদেনা হৈ।
 হাদে গম লাগে চানাত্ বৈ।

—০৪/০৭/২০১৬ ইংরেজি।

(৭৯) আঝার মাজ

দুরোদুরি মামু ঘর,
 চিজি য়েব' বজর পর।
 উজুমহনে আঝার মাজ,
 ঠেঙে ন' ছুয়োয় মাদি বাজ্।

এক জাগা লুচ্ এক জাগাত্ যায়,
 হাক্লে হন্যাঁ আজার হায়...
 যাদে যাদে বেল্ দিবোর,
 এক্কা আজারে তিন্ চিদোর!!!

—০৯/০৭/২০১৬

(৮০) চেজেক্ বুবুক্

চেজেক্ চেজেক্ ভাত্ পিলে,
 তেদের তেদের দেবা ঝড়।
 দ্বিবে গরুলোই ধেদেক্ ধেদেক্,
 বামত্ বাঝে জুনোপহর্।

দারবো অয়ে লেদা লেদা,
 পিবির পিবির বুইয়ারান্।
 গরুউন্ ন' আধন্ সুজুর সুজুর,
 ঘরত্ রুয়ে জুমোরান্।

ভাতুন্ অলাক্ পেচ্ছাল্ পেচ্ছাল্,
 হুজুক্ হুজুক্ ঘোরবোউন্।
 দুধ্ ন' হেলে ঘিলুকবলা,
 হেনে অবাক্ পোড়বোউন্।

গরু ছ'বো ছিয়ান্ ছিয়ান্,
 দুনুম্ দুনুম্ হন্যাঁ যার?
 হিল্যে হিয়ো পিয়ক্ পিয়ক্,
 দুধতান্ উদুরেবো পেলাংবার!

—১২/০৭/২০১৬

(৮১) ডিজিটাল বৈদ্যালি

উন্দুরবো গল্ল' মোবাইল,
বেলেইবো ধল্ল' ফোন্।
মুইদ' ইক্কে ঘরত্ নেই,
এ্যদো শিরে মোন্।

ম' বুড়ির উয়ে মাধা পিড়ে,
দিধে তেল্ পুড়ি।
আগা পাদাত্ জেততেল' নাদাত্,
ফোনান্ থাক্ ধুরি।

অসুগে অসুগে বাজার বন্,
নেই হোনো তেল্।
ডালি, বাহৰা দেধে দেধে,
গদা জিংহানিয়ান্ গেল্।

মাধা উজু ফোনান্ ধুরি থাক্,
মন্দর জুবি চাং।
গম্ ওই গেল্ মাধা পিড়ে,
তুই থাক্ মুই যাং।

—১৮/০৭/২০১৬ ইং

(৮২) চিজি ইক্কুলোত্ য়েব'

মাধাত্ গুলি তুমবাচ্ তেল,
 পিদিৎ বুগি বেগ্।
 সনার চিজি ইক্কুলোত্ য়েব',
 মনান্ অয়ে এক্।

লুচ্ছেং বেলেইবো ঠেঙে ঠেঙে,
 ইক্কুলোত্ য়েদ' চায়।
 কান্ ওক্কোরবো হন্ পাক্ হিয়ে,
 ইও হবর ন' পায়।

দাধা আক্কল্ বেভে পিচ্ছে,
 মধ্যে সনার চিজি।
 লুচ্ছেং বেলেইবো কানেল্লোই,
 চোখকুন্ পুঝি পুঝি!

—২০/০৭/২০১৬ ইং

(৮৩) বেবে বেনান্ উদোনত্

টেঙা - পয়জা বোনোই আধত,
 রাঙা - কালা দগানত্।
 পোজ্জেন্ আঘে, টানাত্ নেই,
 বেবে বেনান্ উদোনত্।

ভাত্ - তোন মজা উব্ নেই,
 বোনোই যিয়েগোই বাজারত্।
 বাজার' ফিয়ে টাঙেয়্যা রুয়ে,
 দোগোনো বাজ' ইজরত্।

বেন্ মুজুঙোত্ বেবে আঘে,
 বাজার' পধতান্ চেই।
 বোনোই আধত্ সিদোলো পঙাঁ,
 এক নাল্ সুধোও নেই।

—২১/০৭/২০১৬

(৮৪) হন্যাঁ হাম্মো?

হন্যাঁ হাম্মো? সনার চিজি!
 ইক্কুলোত্ যায় আঝি আঝি!
 হন্যাঁ হাম্মো তাত্তুন্ বেশ্?
 য়েবেলা-ওবোলা বোইবো শেঝ্!

হন্যাঁ আলজি? বেলেইবুঅ।
 উন্দুরে গত্তন্ হলঅ লবঅ!
 উবোম্ গুরি ঘুম্ যায়।
 ভাত্তুন্ হাদে সোদ্যে তোগায়!

—২৪/০৭/২০১৬ ইং

(৮৫) সনার চিজি ইক্কুলোত্ যার

চুলোন্ কাবি জুরগি সাজ,
 মাধাত্ গুলি তেল্।
 দচ্ বাবুয়ে এক্ বাবু,
 চিজি ইক্কুলোত্ গেল্।

ঠেঙত্ পিনি বোজ্জদা,
 আধত্ পিনি ঘুড়ি।
 টনঙ্ টনঙ্ ইক্কুলোর যার,
 মাদিত্ ন' বাজের মুড়ি।

—২৯/০৭/২০১৬ইং

(৮৬) আমা চিজি ওমা ওক্

চিগোন্ চিজি চিগোন্ নয়,
 যুনি একদিন্ ডাঙ্ৰ অয়...
 চক্রবত্তি রাজা অব' পিখীমিত্।
 বেঙ্কুন্ এগত্তর গুরিবো এক্ সাজিত্।

গোদা পিখীমিয়েন্ করত্ তল্,
 অহবাক্ বেঙ্কুনে বলত্ তল্।
 হজোত্ ফুদিবাক্ পদ্মফুল্!
 উদ্ধার গুরিবো জেদিহুল্।

আধত্ তুলিবো নেয় বিচার।
 চাহদে সোনা মূ হোচপেবার!

উগুরে আগাজ্, তলে দজ্যে,
সেত্তমান্ অবো চিজির ধোয্য।

তমা মূয়োত্ ফুল্ পড়োক্।
আমা চিজি ওমা ওক্!!!

—৩১/০৭/২০১৬

(৮৭) বান্দর' ধান্ তলোই

বেবে মরেল্লোই পেক্ রাঘাত্,
চিজি গা ধুজ্জৈ গান্।
বেলান্ ডুবেল্লোই আঝি আঝি,
বান্দরে শুগাদন্ ধান্।

নানু ডাগের ওয়াঙ্ ওয়াঙ্,
নাগর চিজি হোই?
রিনি চেলে ঝাদি আয়,
বান্দর' ধান্ তলোই।

নানু দেঘে দেয় গাজ' মাধাত্,
চিজি চাইদি মেঘকানি!
বাচ্ছে থাক্, উগুরে দোঙগি,
চোঘো ভঙ্গানি বেক্কানি!

—০২/০৮/২০১৬ ইংরিজি।

(৮৮) যে চাঙমা সে চাঙমা

মাঞেঁ হধা দুরোত্ থং,
 মরে মুই পুজোর লং।
 ও মুই হন্যা? মুই হন্যা?
 কিয়ে হন্ ন্গোষ্ঠী,
 কিয়ে হন্ উবোজাত্।
 হিচ্ছু মুই ন' বুজং...
 মুই যে চাঙমা, সে চাঙমা!

দুখকাম্ ত' গুরি,
 দিন্নো ন'অলে ছ'হুড়ি।
 ঘি দিনেই টানি চাং,
 নাক্য অয়নি লাস্বা।
 আ হেই...
 যে নাক্ সে নাক্,
 চেবেদাক্ চেবেদাক্!
 যে চাঙমা সে চাঙমা!

—১০/০৮/২০১৬ইংরিজি।

(৮৯) আন্ধার ঘরত্ অবং পহর

সমাজ্যে-সমারি একুই মন্,
 উচ্ছো ফুচ্ছোই ইক্কুল্ সং।
 আমা ইক্কুল্ আমা ঘর,
 আন্ধার ঘরত্ অবং পহর।

এগোবো অবং ফুলোসান্,
 নিঘিলিবো ফুলোর তুমবাচ্ছান্।
 ছিদি পুড়িবোং পিখীমিত,
 নাঙ্ রাগেবং গম্ কিত্তিত্।

আমি জাদর, আমি বেগর,
 আধ্ তুলিনে দির হবর।
 লেঘা শিঘি কাত্ অবং,
 দেজ্-জাদর মান্ রাগেবং।

—২৫/০৮/২০১৬ ইংরিজি।

(৯০) ফুয়াই ই ই...বাল্যা

ফুয়াই ই ই... বাল্যা...
 যগোই...যগোই... যগোই...
 উঁউঁউ...হুই...ই...ঈ...

এদক্ গুরি জগার পারং,
 নয়য়ো শুনোন্ পেঙ্কুনে।
 যার যে কামে আজের নেই,
 আমা ঘোরবোউন্ বেঙ্কুনে।

বেবে যিয়ে কুয়ো গাঙ্ত,
 দাধার আমিজে বেড়ানা।

ইক্কো গুরি ছরমা গরু,
আজু ভাগত্ চড়ানা।

জুমোন্ উয়ে মাধা রাঙা,
চিত্ ভুজিবো পাহ।
এক্ আধ্ ফারক্ ধাত্ শিজিত্,
মেমে ছাওলি বাহ।

মামাহ্ কয়দি ভাত্ পেবং,
বাবা কয়দি বাচ্ছে থেচ্।
ধান' ছদিবো পেলাং বাহর বো...
মিজ়েলে-হজ়ালে হেচ্।

—২৭/০৮/২০১৬ ইংরিজি।

(৯১) ওলি (ঘুমপাড়ানি)

চিজি,
চিজিক্করে ঘুম্ নেযে নোযাই ঘরান্ কাজ়েস্,
... ভাতপিলেবু ওদোরেস্,
...তোন্ একপদ্ রানিস্,
আমি জুমোত্তুন্ এলেগোই গরম্ গরম্ তিদেশাক্ রাহনি
হেবংগি। এদুরোত্ হোইহাই মা-বাবে কামত্ যান্। মা-
বাবর ডাঙুরবো অলে বানাহ্ দুখ্!

চিজিক্করে এবার ঘুম্ নেজানা! দবছহবে ঘুম্ ন' যায়! ঘুম্

ন' নেজেলে কাম্ গুরি ন' পায়। ঢুলোনত্ পড়েন'।

... বেবে মরে একান্ হেত্যা হোই দে।

... হেত্যা হোই দিলে ঘুম্ যেবেনি?

... যেম্,

... শুনিথাক্ বজোস্...

ওলি

এ...ভে...এ...এল' এক রা...জা...!

রাজার এলাক্ তিম্নো পুও।

তিম্নো পুওই রেজ্য চান্।

মান্তর,

কিয়য় প্রজারে কোচ্ ন' পান্!

...বজোস্! ইঁ পড়া চিক্কো...

... ইঁ!

সেনত্যে রাজাহত্তাহ্ ভাবীনে।

সনার চিক্কো তরে হোচ্ পেইনে।

তরে দিল' রাজ্য ভাগ্।

সনার চিজি চুক্কি থাক্।

...বজোস্!

... ইঁ!

রাজার আগন্ য়েদ্-ঘড়া।

সোনা-রুবো দুল্ ভরা!

দুধোলী গরু ন' হরন্।

হে পারিবে চিক্কো, পেঠ্ ভরন্!

... বজোস্!

... ইঁ!

যুনি রাজায় গরে ভাগে ভাগ্।
রাজায় তিন্নো পুওয় ন' পেবাক্।
চেই থাক্, চিক্কো তুই চেই থাক্।
তরে হামাক্কায় দিব' ডাঙ্ৰ ভাগ্।
সনার চিজি চুক্কি থাক্।

... বজোস্!

... ইঁ!

রাজার ঘরত্ রাজার ঝি।
পরী মিলে সান্ গুরি।
আমিজে বেরেই থান্ লগে সমারী।
রাজার ঝিবো সেম্বা দোল্!
চিক্কো তুই দেলে, অব্বে ওল্!

... বজোস্!

... ইঁ!

কানিলে মুক্তো ঝাড্ন্!
আঝিলে মানিক্ পড্ন্!
আধিলে হুজোত্ ফুল্ ফুদন্!
রাজার ঝিবো এব' পালকিত্ গুরি।
চিজিরে নেজেব' করত্ গুরি।
রাজায় তা ঝিবো বো দিব'।
সনার চিজি এবার ঘুম্ য়েব'।
... ঘুম্ এজের চিক্কো?
... ইঁই... (ঘুম্ য়ার...)

—০৫/০৯/২০১৬ ইংরিজি।

(৯২) চিত্ পাগল্ ডাঙঁর ভুজি

চিত্ পাগল্ ডাঙঁর ভুজি,
 তোনোত্ ন'দে সাবারাং-ফুজিঁ।
 হদক্ হে পারে যুজি যুজি।
 বেগুন্ তোন, আমিলা বুল্,
 বাচ্ছুরি গদেয়ে, ওলোদো ফুল্।

পুল্যাঙ' তলাত্ সুজমুরিচ্,
 বের' মাধাত্ তেল্।
 ভাত্-তোন্ পিলে উত্য়েফুত্য়ে,
 বিলেইবো ডিগেই গেল্।

—০৬/০৯/২০১৬ ইংরিজি।

(৯৩) আমা ভুজি ধহল্ করা

আমা ভুজি ধহল্ করা!
 পহঁত্যা যিয়ে চোল্ করা।
 ডবল্লা চোলোভাত্ বরা বরা,
 চিজিক্কা তোগায় মুঠ্ জরা।
 ডিঙিঁ কিলেত্ ভারভারি নেই,
 সোর গুরিবেক্ কমলে!
 এক্ ভুক্ দ্বি ভুক্ দি ন' পারে,
 চোলুন্ পরন্দোই ওয়ালে!

—০৭/০৯/২০১৬ ইংরিজি।

(৯৪) বান্দরে ঝাড়দন্ ঘুচে তায়

বান্দরে ঝাড়দন্ ঘুচে তায়,
 ঘুচে মাধাত্ বোই।
 দাধাহ্ খেলেল্লোই ঘিলে খারা,
 দিবের হবর নেই চৈ।

মামাহ্ কা দের চিগোন্ সুধো,
 চোরগি কলান্দোই।
 বেবে তুলের খাদিত্ ফুল,
 আলাম' ফুলুন্দোই।

বাবাহ্ গরের পেবের পেবের,
 বেক্কুনে থবাহ্ থবাহ্!
 বিবু এজের, বাচ্ছে থাগ',
 কনে কি লবাহ্!

—১৭/০৯/২০১৬ ইং।

থুম

যোগাযোগ:

আলোময় চাকমা

মোবাইল : ০১৭৬৪৩৫৬৮৮১

ইমেইল : alomoyc6@gmail.com